

L'iniziativa da linguas estras è nunvalaivla

La Lia Rumantscha è cuntenta – malgrà che la problematica resta

■ (Ir) A la sessiun da l'avrigl ha il cussegl grond decidì cun ina maiortad clera da 82 tar 34 vuschs: l'iniziativa da linguas estras è nunvalaivla e na vegn betg suttamessa al suveran per la votaziun. La Lia Rumantscha (LR) è cuntenta cun il resultat da la debatta, malgrà che la problematica cun las linguas estras en scola primara n'è anc betg schliada. Duas linguas estras en scola primara saja memia bler, ina part da las scolaras e dals scolars sajan surdumandads cun il concept da lin-

guas estras. Uschia avevan argumentà ils iniziants da l'iniziativa da linguas estras avant la debatta. La LR prenda serius ils signals che scolaras e scolars pudessan esser surdumandads cun duas linguas estras en la scola primara. Ella lascha valair il malesser ch'è la basa dal text da l'iniziativa ed il basegn da discutir la dumonda en l'emprima part dal text, sch bain mo ina lingua estra duai esser obligatoria en la scola primara. Perquai è la LR anc adina da l'opiniun ch'il chantun stoppia s'occupar da las difficultads cun

las linguas estras en scola primara. Cun la nunvalaivladad da l'iniziativa da linguas na datti dentant betg in tractament inegal da scolaras e scolars rumantschs quai che riguarda l'instrucziun da l'englais.

Evità consequenzas gravantas per il rumantsch

Sche la populaziun avess ditg gea a l'iniziativa, fiss sa tschentada la dumonda tge lingua che avess valì sco lingua estra en il territori rumantsch. Sche quai fiss

stà il tudestg, avessi dà in tractament inegal dal model da scola rumantsch en cumparegliaziun cun il model da scola tudestg. Las scolaras ed ils scolars d'ina scola rumantscha avessan pudì entschaver pir bler pli tard ad emprender englais che las scolaras ed ils scolars d'ina scola tudestga. In tal tractament inegal avess ultra dals dischavantatgs per las scolaras ed ils scolars era gi consequenzas gravantas per la lingua rumantscha. Las regiuns italofonas avessan gi problems sumegliants.